



Inatsisartuni ilaasortaq Pele Broberg, Partii Naleraq
/maani

Kangerlussuarmi Mittarfik pillugu § 37 naapertorlugu apeqquteqaammut 2019-148-imut akissut.

01-04-2019
Suliaq nr.: 2019 - 7581
Id nr. 39624347

Asasara Pele Broberg.

Inatsisartut suleriaasianni § 37 naapertorlugu Naalakkersuisunut apeqquteqaateqarputit. Apeqqutit uannit akineqartussatut innersuunneqarput. Apeqqutit matuma kinguliani ataasiakkaarlugit issuarneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

Apeqqut 1: Naalakkersuisut innuttaasunut ataatsimiisitsineranni Sisimiuni ulloq 17. Marts 2019 Aatsitassanut Sulisoqarnermullu Naalakkersuisumit oqaatigineqartut najoqqutaralugit, qanga Naalakkersuisut malissallugu aalajangersimavaat saqqummiussamaarsimavaallu, qanoq akeqassava, qanorlu inuiaqatigiinnut tamanna kingunissaqartitsiva, taavalu Kalaallit Airports International A/S-imut kinguneqassava?

Akissut:

Apeqqutip 1-ip akissuteqarfigineqarnissaanut atugassamik, ulloq 17. marts 2019 innuttaasunik ataatsimiisitsinerami oqaaseqaatit pillugit Aatsitassanut Suliffeqarnermullu Naalakkersuisumit Erik Jensen-imit ilassutissanik piniarpunga. Aatsitassanut Suliffeqarnermullu Naalakkersuisoq Erik Jensen imatut paasissutissiivoq:

"Naalakkersuisut annikillitsinissamik allanilluunniit suliaqarnerarneqarnerat ilisimasaqarfiginngikkiga, innuttaasunik ataatsimiisitsinerup nalaani oqaatigaara. Aammattaaq oqaatigaara mittarfiup matuneqarnissaa imaluunniit 2810 meterinit annikinnerunissaa ilisimasaqarfiginagu.

Naalakkersuisut Inatsisartunit kissaatigineqartut, piumasaqaatigineqartut aalajangiinerillu naapertorlugit sulisut, aamma innersuussutigaara. Tassami Kangerlussuup siunissaanut periarfissat qulaajarlugit suliaqaleruttortumik, suleqatigiissitaliamik pilersitsisoqareerpoq. Qulaajaaneq suliaqatigiissutit allassimaffiat Naalakkersuisunit aamma Qeqqata Kommuniarut akuerineqartoq naapertorlugu ingerlanneqarpoq."

Aatsitassanut Suliffeqarnermullu Naalakkersuisumit oqaaseqaatit, innuttaasunik ataatsimiisitsinerup nalaani suut taakkartorneqarsimanersut toqqammavissatut, tunngavigissavakka.

Uppernarsarsinnaavara Kangerlussuup siunissaa pillugu suleqatigiissitaliamik pilersitsisoqarmat. Taamaaqataanik Narsarsuup siunissaa pillugu suleqatigiissitaliamik pilersitsisoqarpoq. Suleqatigiissitaliat marluusut suliasat allattorsimaffiinnik Naalakkersuisut aamma Qeqqata Kommuniata aammalu Kommune Kujalliuup ukioq

manna januaarip qaammataani akuerineqartunik aallaaveqarlutik sulipput. Suliassat allattorsimaffii Naalakkersuisut nittartagaanni pissarsiarineqarsinnaapput.

Suliassat allattorsimaffiini aammalu kingusinnerusukku oqaaseqaatini takuneqarsinnaavoq, Naalakkersuisut kommunit pineqartut peqatigalugit ataatsimoorussamik qulaajaalluni suliaqarnerup inernissaannut sioqqutaarisimangitsut.

Tamatuma saniatigut, Illersornissaqarfimmit kissaatigalugu saqqummiunneqarsimasutut, Illersornissaqarfik Kangerlussuarmiinnassappat, sunniutaasussat periarfissallu paasinarsisinnissaat pillugu suleqatigiinnissamik danskit naalakkersuisui aamma Naalakkersuisut isumaqatigiissimmata, oqaatigissallugu inissaminiissinnaavoq. Tamatumingna Inatsisartut ilisimatinneqareerput aammalu tamanna Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisup tusagassiutitigut nalunaarutaani 21. marsi 2019-imeersumi allassimavoq. Tusagassiutitigut nalunaarut Naalakkersuisut nittartagaanni takuneqarsinnaavoq.

Apeqqutiginartunut allanik oqaaseqaatissaqanngilanga.

Apeqqut 2: Apeqqut 1 najoqqutaralugu qanoq kinguneqassava; tassa qanoq tamanna akeqassava, qanoq innuttaasunut kinguneqartitsissava, taavalu Kalaallit Airports International A/S-imut qanoq kinguneqartitsissava?

Akissut:

Apeqqummut 1-imut akissuteqaatinni allassimavoq kommuni aammalu Illersornissamut ministereqarfik, tamarmik Kangerlussuarmi mittarfiup siunissaata paasinarsinneqarnissaanut peqataasussat, peqatigalugit qulaajaanermik suliaqarnerit assigiinngitsut aallartinneqarsimasut. Qeqqata Kommuniata aamma Illersornissamut ministereqarfiup suleqatigineqarnerisa aallartinneqareersut naammassinissaat sioqqullugu Kangerlussuup siunissaa pillugu aalajangiisoqassasoq naatsorsuutigingilanga.

Isumaqarpunga pissutsit apeqqummi taaneqartut pillugit oqaaseqarnissamut tunngavissaqalernissamut, qulaajaanermik suliaqarnerit aallartinneqareersoq utaqqimaarneqartariaqartoq.

Apeqqummut saqqummiunneqartumut allanik oqaaseqaatissaqanngilanga.

Inussiarnersumik inuulluaqqusillunga



Karl Frederik Danielsen